

07 JUN 2003

Agong-Perbarisan

ISTIADAT ARAK PANJI-PANJI MULAKAN SAMBUTAN HARI KEPUTERAAN AGONG

KUALA LUMPUR, 7 Jun (Bernama) -- Yang di-Pertuan Agong Tuanku Syed Sirajuddin Syed Putra Jamalullail berangkat menghadiri istiadat mengarak panji-panji sempena sambutan Hari Keputeraan Seri Paduka di Dataran Merdeka di sini, hari ini.

Raja Permaisuri Agong Tuanku Fauziah Tengku Abdul Rashid turut berangkat ke istiadat itu.

Istiadat dimulakan dengan perbarisan menyembah lagu "Hormat Diraja" oleh pancaragam pusat Angkatan Tentera Malaysia (ATM) diikuti dengan 21 das tembakan meriam kehormat.

Seramai 496 anggota dan 22 pegawai Tentera Darat, Tentera Udara dan Tentera Laut mengambil bahagian dalam perarakan panji-panji itu yang diketuai oleh Lt Kol Nor Mubarak Md Som.

Perarakan itu diakhiri dengan kawad mara menghadap dan diikuti dengan lintas hormat dua helikopter Aloutte, dua helikopter Nuri dan satu helikopter Equirrel yang membawa bendera-bendera Malaysia, Tentera Darat, Tentera Laut dan Tentera Udara.

Turut hadir pada majlis sambutan itu ialah Perdana Menteri Datuk Seri Dr Mahathir Mohamad dan isteri Datin Seri Dr Siti Hasmah Mohamed Ali serta Timbalan Perdana Menteri Datuk Seri Abdullah Haji Ahmad Badawi dan siteri Datin Seri Endon Mahmood.

Para menteri kabinet, orang kenamaan serta perwakilan asing turut menghadiri majlis itu.

Upacara itu juga disaksikan para penduduk ibu kota serta pelancong asing, yang membanjiri Dataran Merdeka sejak awal pagi ini.

-- BERNAMA

CS HK NAK